

# La Clinica Holistica Engiadina ingrondischa

**Culla cumprita da la Chasa Moser vis-à-vis da la Clinica Holistica Engiadina dess la sporta da la prüma clinica da burnout in Svizra gnir schlargiada. Per Mattias Bulfoni es la decisiun d'investir ün rinforzaint da la posiziun a Susch.**

NICOLO BASS

L'eivna passada ha Mattias Bulfoni da Susch suottascrit il contrat da cumprita e cun quai miss ün ulteriur affar suot têt. La Clinica Holistica Engiadina ha cumprà ün ulteriur stabilimaint i'l minz dal cumün da Susch ed in vicinanza da la clinica. Quista gronda chasa engiadinaisa, d'asper la Susasca, es tenor Mattias Bulfoni, ideala per sviluppar inavant la sporta da la prüma ed unica clinica da burnout in Svizra. Raduond ses milliuns francs vuol Bulfoni investir illa cumprita ed illa renovaziun dal stabilimaint. Illa stalla veglia ed i'l tablà vuol el realisar ün center da sport, ingio chi pon gnir sportas novas terapias, per exaimpel cun sport d'archers, cun metodus da combat cul bastun, ed üna paraid da rampagnar. Illa chasa engiadinaisa vain integrada tuot l'administraziun da la Clinica Holistica Engiadina. «E la gronda stüva veglia da lain dess dvantar ün lö da retratta», quinta Bulfoni. Dürant il prossem temp dess gnir fatta la planisaziun detagliada ed el vuol cumanzar vers utuon culla fabrica. «Il böt füss da pudair far amo d'utuon las plattas da beton, uschè cha tuot la fabrica dadaint pudess gnir realisada d'ürant l'inviern», quinta'l. Bulfoni vuol figià da prümavaira 2020 avair fini la fabrica per pudair far müdada cun l'administraziun.

## Dudesch novas stanzas

Intant es l'administraziun sparpagliada illa clinica principala e per part dadatta illa chasa Steinbock. Cun concentrar tuot al medem lö, survain la clinica



Il president dal cussagl administrativ Mattias Bulfoni es superbi da sia nov'acziun: La Clinica Holistica Engiadina ha cumprà la Chasa Moser, üna gronda chasa engiadinaisa cun uschèls verds, vis-à-vis da la clinica actuala, per pudair ingrondir la sporta.

fotografia: Nicolo Bass

plazza per ulteriuras stanzas. Il president dal cussagl administrativ fa quint cun dudesch novas stanzas cun in tuot 24 lets. La Clinica Holistica Engiadina chüra e tratta tanter 55 e 60 paziaints l'eivna. Culla nov'investiziun nu vuol Bulfoni be ingrondir, dimpersè impustüt eir garantir e mantgnair la qualità. Cha la quantitè dals paziaints l'eivna nu saja dependenta da la quantitè dals lets, ma impustüt da la quantitè dal personal, quinta'l. Actualmaing dombra la Clinica Holistica Susch passa 100 lavuraints. E cull'investiziun illa

chasa Moser gnarà il nomer da personal darcheu augmantà.

## Sün giavüsch da la possessura

Daspö il 2010 exista la Clinica Holistica Engiadina a Susch. Quella jada lavuravan 22 collavuraturas e collavuratuors illa prüma clinica da burnout in Svizra ed els chüraivan a desch paziaints. Fingià davo ün on ha la Clinica Holistica Engiadina scrit il prüm guadogn. Fin l'on passà d'eira Mattias Bulfoni eir possessur da la clinica. Qua cha sia figlia nun ha vuglù surtour ils affars da seis

hap, ha vendü Bulfoni tuot il chapital d'acziun a la firma Senevita AG, chi posseda ed administrescha 25 dmuras da chüra e fliamaint in Svizra. Vairamaing vulaiva Bulfoni eir as retrar sco president dal cussagl administrativ. Però sün giavüsch da la possessura ha'l ignü quist mandat per ulterius duos ons. «Plü bod pudaiva decider tuot sves, hoz stögli il prüm dumondar a la possessura», quinta'l dal müdamaint principa. El es fich cuntaint cha la nouva possessura haja sustgnü l'idea da surtour la chasa Moser e cun quai d'ingrondir ed

investir in ün terz stabilimaint. «Quai es eir üna decisiun importanta pella posiziun a Susch», disch Bulfoni cun persvasiun. El nu schneja, cha la Senevita AG vaiva in vista ulterius lö in Svizra. «Cun decider per Susch, nu saran oters lö pel mumaint plü ün tema», disch il president dal cussagl administrativ. Uschè restarà la clinica a Susch eir d'ürant ils prossems ons l'unica clinica da burnout in Svizra. «E listess vain copchada l'idea», declera Mattias Bulfoni e quinta d'esser in trattativas per ün projet congruent in China.

# Fermativa dal banc viandant illa Val Müstair

**Dürant la stagiun da viandar fa eir ün banc il viadi tras la Svizra. Il banc viandant da la societä «Bankkultur» visitescha d'ürant la stä duos lö in l'intschess rumantsch.**

La societä «Bankkultur» ha inventarisà l'on passà cun l'agüd da la populaziun svizra passa 14000 bancs. In üna charta interactiva sun registrats ils lö correpresents e documentats cun üna fotografia, ün cuort commentar ed ulterius infuormaziuns nüzzaivlas. Sülla charta pel chantun Grischun as chatta totalmaing 645 bancs, da quels as rechattan 269 in Engiadina e la Val Müstair.

## Fermativa in l'intschess rumantsch

Eir per quist on ha la societä «Bankkultur» cun sia presidenta ed inizianta, Renate Albrecher, planisà ün'acziun. Il la stagiun da viandar vain tramiss ün banc inramà surdimensionalmaing in viadi tras la Svizra e las quatter regiuns linguistics dal pajais. In l'intschess rumantsch fa il banc viandant fermativa in gün illa Val Müstair ed in lögl illa Val Fex pro Segl Maria. Cun quist'acziun as voula render attent a l'importanza istorica dals bancs, saja quai in connex cun

la sandà, il viandar, il turissem o eir per la vita sociala. «In ün blog da viandar as poja perseguitar il viadi dal banc particular», manzuna Albrecher. In quel as chatta eir tuot las infuormaziuns bsögnavlas dals lö ospitants dal banc viandant sco eir dals arrandschamaints planisats. «Quist banc surpiglia eir l'uschè nomnada funcziun da pop-up», uschè la presidenta. Quai significha chi'd es pussibel d'inscuntrar il banc surpudentamaing eir in oters lö in Svizra. Tenor Renate Albrecher sun ils bancs eir guidas quietas pels turists. «Els as rechattan pel solit in fich bels lö illa natura e muosson in che direziun chi's dess drizzar l'ögliada», disch ella ed agiundscha, «ils bancs d'eiran lösch avant instagram motivs per las megl-dras fotografias da reclama.»

## I'l purtet da la clostra

Sülla carta interactiva dals bancs sun indicats 13 lö illa Val Müstair. Ün d'els as rechatta lung la senda grischna dal Son Giachen, ün oter banc vain protet d'ün grip ed ün oter invida a far la posa davant la Clostra Son Jon a Müstair. «In Val Müstair daja fich blers bancs chi invidan a far la posa», disch Franziska Peter, respunsabla per la fuormaziun e la cultura pro la Biosfera Val Müstair. Uschè s'haja realisà avant ün pèr ons ils bancs chi invidavan a leger. Il mainagestiuon dals Parcs Svizzers



Il banc viandant, fabrichà tenor il model da la «Landi 1939», riva eir illa Val Müstair.

fotografia: mad

tilla vaiva rendüda attent a l'acziun d'ingon da la societä «Bankkultur» cun lur banc viandant. A chaschun dal marchà da Tschinquasima rivarà il banc per ün di a Müstair. «Noss'idea füss da til tgnair plü lösch pro nus e

cha nus til pudessan metter bain in purtet culla clostra.»

## Üna part da la cultura

La societä svizra Cultura da bancs s'ingascha daspö l'on 2016 per la pro-

moziun da quista cultura. Pussibilitats publicas per as tschantar sun lioms importants tanter l'uman e la natura sco eir tanter dals umans svesa. Daspö tschientiners sun ils bancs üna part da la cultura svizra e sun üna tradiziun. Sco segn d'ospitalità invidan els ad ün e minchün da's fermar e da tour piazza. Renate Albrecher es inchantada dal success da l'acziun da l'on passà. «I fa impreschiun cun che ingaschamaint ed entusiassem cha la populaziun s'ha partecipada a quist projet.» Sülla pagina d'internet «bankgeheimnisse.ch» as poja eir in avegnir agiundscher üna fotografia da seis banc predilet ed indichar il lö, la ragiundschiabiltà dal banc ed otras indicaziuns. Qua cha'l bancs nu tradischan ils secrets e las istorgias ch'els vengnan a savair, s'haja eir la pussibilità da notar l'istorgia persunala chi'd es collidada cul banc predilet. «In dudesch chantuns vaina ragiunt il böt da registrar 1000 bancs cun lur lö ed istorgias», manzuna Albrecher. Il banc viandant es üna copcha d'ün model cuntschaint e chi festagia ingon il giubileum dad 80 ons: Il banc chi d'eira gnü sviluppa per la «Landi», l'exposiun nazionala chi ha gnü lö l'on 1939 a Turich. (anr/afi)

Il banc viandant fa fermativa als 9 da gün pro'l marchà da la Biosfera pro la Clostra Son Jon a Müstair. Dals 14 fin als 21 lugli as chatta il banc illa Val Fex pro Segl Maria e quai a chaschun dals concerts da la dumengia.